

三國志旁證

三國志旁證卷十八

閩長樂梁章鉅撰

傳鄧艾鄧艾字士載義陽棘陽人也

集古錄云艾碑作父當讀若刈 一統志云棘陽故城在南陽府新野縣東北古曰黃棘 按史記楚懷王二十五年與秦昭王盟于黃棘卽其地也

注從典農司馬求入御 又皆當遠至爲佐相

晉書石苞傳亦載此事求入御作求入爲御當遠至爲佐相作並當至卿相文義似較明

宜開河渠可以引水澆溉大積軍糧又通運漕之道

太平寰宇記卷十云漑灌城在陳州商水縣東北二十里隋圖經云鄧艾所築西華縣西二十里有柳城故老傳云女媧

氏之都本名渦城鄧艾營稻陂時柳舒爲陂長後人因名爲柳城又卷二十四云陂在蔡州西平縣界並鄧艾所置磚城在潁州沈邱縣東北四十五里司馬宣王使鄧艾於此置屯種稻以備東南築城圍倉廩

陳蔡之間上下田良可省許昌左右諸稻田并水東下令淮北屯二萬人淮南三萬人十二分休常有四千人且田且守

明監本四千誤作四萬 李龍官曰淮北二萬淮南三萬共五萬人以十二分休計之止應四千有奇不得云四萬也今殿本已改正

可積三萬斛於淮上

晉書食貨志淮上作淮北

宣王善之事皆施行

太平御覽卷三百三十三引事皆施行作皆如艾計下有遂
北臨淮水自鍾離而南橫石以西盡泚水四百餘里五里置
一營營六十人且田且守兼修廣淮陽百尺二渠上引河流
下通淮潁大理諸陂於潁南潁北穿渠三百餘里溉田二萬
頃淮南淮北皆相連接自壽春到京師農官兵田雞犬之聲
阡陌相屬凡九十七字下接每東南有事云云按冊府元龜
所引畧同惟脫五里置一營營六十人二句此文實見晉書
食貨志杜氏通典引之一在漕運門一在屯田門嚴長明曰
此九十餘字爲承祚本書文不知何緣佚去也

阻兵仗勢足以建命又輒移屯附亭又出劍閣西百里去成都
三百餘里又乃叱忠纂出將斬之

殿本考證云建疑作違附亭元本作陽亭西百里太平御覽

作四百里宋本無出字北宋本出作等

以艾爲太尉增邑二萬戶

潘眉曰魏朝爵土無封二萬戶者宗室諸王惟任城王彰陳思王植曾封萬戶正始中曹爽封武安侯邑萬二千戶羣臣惟張魯以客禮封關中侯邑萬戶滿寵封昌邑侯前後增邑至九千六百戶艾同時鍾會破蜀進封侯增邑亦不過萬戶艾獨增邑二萬戶若非傳寫之誤則特典也
並作舟船豫順流之事

殿本考證云豫下元本多備字

注 瓘聞之不候駕而謝

殿本考證云候宋本作俟

艾憮然不樂

撫一本誤作撫今 殿本已改正

臣以爲艾身首分離捐棄草土宜收尸喪還其田宅

太平寰宇記卷八十七云遂州小溪縣鄧艾死葬此郡有祠存

埋一魂而天下歸其義

何焯曰埋宜作理上云莫肯理之是也

詔曰艾有功勲受罪不逃刑而子孫爲民隸朕常愍之

殿本考證云民北宋本作萌

注咸甯中積射將軍樊震爲西戎牙門

宋書百官志有積射將軍而不言建置之由漢志無之則是魏晉間置矣

艾州里時輩南陽州泰亦好立功注世語曰宣王爲泰會使尙

書鍾繇調泰君釋褐登宰府三十六日擁麾蓋守兵馬郡乞兒乘小車一何駛乎泰曰誠有此君名公之子少有文采故守吏職獼猴騎土牛又何遲也

陳浩曰鍾繇已卒於太和四年疑調泰者當是鍾毓又按何焯曰檢毓傳正元中乃爲尚書齊王初方官黃門侍郎世語當是稱其後來所歷之職若當泰典郡時毓已先踐八座恐不得屈滯相嘲矣世語所記疑其不實

鍾會傳太傅繇小子也

按注黃初六年會始生時繇已老矣小子當作少子

注夫人張氏字昌蒲茲氏人又孫氏由是得罪出

沈欽韓曰水經注魏黃初二年分太原復置西河郡晉徙封陳王斌于西河故茲氏縣有西河繆王司馬子政廟碑顧

祖禹曰汾州汾陽縣漢茲氏縣魏置西河郡于此 太平御覽卷四百五十七引王景興與鍾元常書諫其室人大歸事云朗白近聞室人孫氏歸或曰大歸也共經憂樂既久矣曷爲一旦離析以至于歸而不返乎不得面談裁書敘心 趙一清曰會母庶也孫夫人也繇寵庶出嫡而更納賈氏乃以二母忿爭之故斥孫氏爲貴妾何其誕耶繇素有名德而于倫理悖繆如此傳所謂深山大澤實生龍蛇果由會謀族哀哉

注松思竭不能改心存之

殿本考證云元本存作苦

又松字叔茂陳留人遷中書郎遂至太守

侯康曰竇泉述書賦注云叔茂終魏中書令大司農 按松

事又見齊王芳紀嘉平五年注

注中書令劉放

明監本劉放作劉表誤今殿本已改正

未蒙皇化此三祖所以顧懷遺恨也

文選鍾士季檄蜀文皇作王恨作志

今鎮西奉辭銜命攝統戎重又以快一朝之政又興兵朔野又

此皆諸賢所親見也又蜀相杜見禽於秦又皆諸賢所備聞也

文選重作車政作志朔作新無也字賢作君按文選杜作

莊實當作壯史記秦本紀有蜀相壯一作狀

就永安之福又大兵一發

文選福作計發作放

欲從漢德陽入江由

潘眉曰陽下當有亭字鄧艾傳云經漢德陽亭趨涪 一統志云江油故城有曰蜀漢江油戍在今江油縣東

參軍爰彰

錢大昭曰爰彰疑卽爰劭之子倩倩字君幼見荀綽冀州記以次梏殺坑中

殿本考證云通鑑作以次梏殺內坑中多內字烈軍兵與烈兒雷鼓出門

錢大昭曰烈兒名淵字世元胡遵之孫也晉書稱其字避唐高祖諱此不知何以稱爲烈兒

就如卿所慮當何所能一辦邪

殿本考證云通鑑作何憂其不能一辦耶

注吾下讎對枯骨

一本吾作殿是也晉書本作殿下

會嘗論易無互體才性同異

世說文學篇云鍾會撰四本論始畢甚欲使嵇公一見置懷中既定畏其難懷不敢出於戶外遙擲便回急走注引魏志曰會論才性同異傳於世四本者言才性同才性異才性合才性離也尚書傳嘏論同中書令李豐論異侍郎鍾會論合屯騎校尉王廣論離隋書經籍志周易盡神論一卷梁有周易無互體三卷道德經注二卷芻蕘論五卷並鍾會撰又集九卷梁十卷錄一卷

初會弱冠與山陽王弼並知名弼好論儒道辭才逸辨注易及老子

世說文學篇云何晏爲吏部尚書有位望時談客盈坐王弼

未弱冠往見之晏聞弼名因條向者勝理語弼曰此理僕以爲極可復得難不弼便作難一坐人便以爲屈於是弼自爲客主數番皆一坐所不及又云何平叔註老子始成詣王輔嗣見王注精奇乃神伏曰若斯人可與論天人之際矣因所注爲道德二論 隋書經籍志王弼注周易六十四卦六卷易畧例一卷論語釋疑三卷老子道德經注三卷又集五卷錄一卷

注時年二十四無子絕嗣

趙一清曰晉張堪列子序稱嗣女婿趙季子然則弼雖乏嗣亦有女矣

又魏氏春秋曰文帝旣誅粲二子以業嗣粲

潘眉曰王粲傳云後絕注亦不言業爲粲嗣此據博物記及

魏氏春秋二條當引入王粲傳

評曰王淩風節格尙至此蓋古人所謂目論者也

何焯曰諸人惟鍾會可加以逆名鄧艾有功無罪至于三賢乃心王室事連不就而典午之勢益重諸人之終卽國之終也故次於此焉又曰史家頗審輕重鍾會在蜀亦矯太后詔不得斷之曰叛也

華佗傳時人以爲年且百歲而貌有壯容

殿本考證云冊府元龜以爲下有仙人二字

言當引某許

沈欽韓曰某許猶言某處世說文學篇云孫安國往殷軍許又康僧淵忽往殷淵源許又支道林殷淵源俱在相王許

昨使醫曹吏劉租

殿本考證云北宋本祖作祖 按太平御覽卷七百二十二

亦引作劉祖

蒜齏大酢 又似逢我公車邊病是也 又有一郡守病

後漢書方術傳作蒜齏甚酸似逢我公九字作客車邊有物
必是逢我翁也病上有篤字

君病深當破腹取

太平御覽卷七百二十二引作君病至深

佗恃能厭食事猶不上道

殿本考證云事字疑衍 按後漢書無食字

注
景宗說中平曰

顧炎武曰古人日月之日皆作日似日字惟以上日日爲別
耳此日字乃日字也卽中平年之義

又瑯琊劉勲爲河內太守至以膏散著瘡中七日愈

獨異志云魏國有女子極美麗逾時不嫁以右膝上常患一瘡膿水不絕遇華佗過其父問之佗曰使人乘馬牽一栗色犬走三十里歸而截犬右足挂之俄頃一赤蛇從瘡而出入犬足中其病遂愈又太平御覽卷七百四十三引志怪云有人得瘕病腹晝夜切痛臨終敕其子曰吾氣絕後可剖視之其子不忍違割之得一銅酒鎗容數合後華佗聞其病而解之便出巾箱中藥以投鎗鎗卽成酒

注行妖慝以惑民

殿本考證云妖慝毛本作妖隱

又吾本師姓韓字世雄又欲其食少而弩行也

殿本考證云後漢書注雄作稚弩作怒

杜夔以知音爲雅樂郎

何焯曰杜公良當與王仲宣同傳不宜與方技伍也

今將軍號不爲天子合樂

何焯曰不字衍

善鍾律聰思過人絲竹八音靡所不能

殿本考證云聰思冊府元龜作聰慧 潘眉曰荀勗以杜夔

所制律呂檢校太樂總章鼓吹八音與律乖錯始知後漢至
魏尺度漸長於古四分有奇夔依爲律呂故致失韻 按此

論本世說術解篇引晉後畧及于寶晉紀

鄧靜尹齊

潘眉曰晉宋樂志竝作尹商此作齊字誤

其聲鈞清濁多不如法

潘眉曰鈞當作均

按均卽古韻字故今

殿本卽作韻

然知夔爲精而玉之妄也

潘眉曰宋律志然下有後字當從之

文帝常令夔與左願等於賓客之中吹笙鼓琴夔有難色由是帝意不悅

陳景雲曰左願當作左驥見繁欽與魏文帝牋文選李善呂向注引夔傳並與牋合善又云驥與顛同音由善注觀之夔傳此字本作驥當是後來傳錄者易爲顛而作願者又顛之轉訛也

自左延年等雖妙於音咸善鄭聲其好古存正莫及夔

侯康曰晉書樂志上杜夔傳舊雅樂四曲一曰鹿鳴二曰騶虞三曰伐檀四曰文王皆古聲辭及太和中左延年改夔騶

虞伐檀文王三曲更自作聲節其名雖存而聲實異唯因夔
鹿鳴全不改易每正旦大會太尉奉璧羣后行禮東廂雅樂
常作者是也後又改三篇之行禮詩第一曰於赫篇詠武帝
聲節與古鹿鳴同第二曰巍巍篇詠文帝用延年所改騶虞
聲第三曰洋洋篇詠明帝用延年所改文王聲第四曰復用
鹿鳴鹿鳴之聲重用而除古伐檀

注况幽深之才無名之樸乎

殿本考證云樸宋本作璞 張照曰無名之樸語本老子宋
本作璞非

朱建平傳朱建平沛國人也善相術

潘眉曰三國列傳雙名者惟建平一人然建平傳不書字當
以字行耳 王肇和曰荀彧傳戲志才司馬朗傳趙威孫裴

潛傳注王惠陽鄭文信劉廙傳劉望之董卓傳注楊整修劉
先主傳劉德然張世平之類皆字也又劉先主傳劉元起後
但書起董卓傳注胡文才傳但稱才管輅傳王宏直後單稱
直疑皆有衍文他若諸葛亮傳之石廣元孟公威則名韜名
建矣秦宓傳之任定祖則名安矣翁歸倉舒則小字也陶邕
一周生烈則複姓也嚴白虎劉雄鳴則賊號也惟管輅傳注
引別傳有劉季龍吳妃嬪傳注引吳書王夫人父名盧九是
雙名然非正史不足據

管輅傳平原人也

此是平原郡之平原縣漢中興後作國建安中國除魏黃初
三年復作國七年除爲郡

注便開淵布筆辭義斐然

殿本考證云開淵冊府元龜作開胸元本作開紙

又互相攻劫

殿本考證云攻劫冊府元龜作攻詰

郭恩兄弟三人皆得瘖疾使輅筮其所由

殿本考證云太平御覽引瘖疾下有不知何故四字 按注引輅別傳有此四字

昔饑荒之世當有利其數升米者

殿本考證云太平御覽引數升作數斗

注未嘗不推機慷慨

機一本作机與几同

兒生便走非能自走直宋無忌之妖將其入竈也

何焯曰急就篇注古有仙人宋無忌此云妖未詳宋無忌見

封禪書索隱引白澤圖云火之精曰宋無忌蓋其人火仙也
以入竈故指爲火之妖

烏與鷺鬪直老鈴下耳

何焯曰太平御覽引此語下更有公府閣有繩鈴以傳呼鈴
下有吏者也當亦是裴注

^注始聞君言如何可得又輅鄉里乃太原

何焯曰可字李安溪先生以意改將 乃太原三字未詳或
疑是人姓名而其字誤耳

^注君備州里達人

殿本考證云元本君備作君侯

其曰乙卯則長子之候也又申未爲虎虎爲大人則父之候也
錢大昕曰於卦位卯屬東方震震爲長男又按虞仲翔說坤

爲虎坤位西南在未申之間於天文參爲白虎位亦在申

翅翼舒張

又舉坐驚喜

注 輅別傳曰諸葛原字景春

殿本考證云太平御覽翅翼作分翅驚喜作驚歎原作樂

又 諸人多聞其善卜

明監本諸人作知人誤今 殿本已改正

注

何尙書神明精微言皆巧妙巧妙之至殆破秋毫君當慎之

自言不解易九事必當以相問

按南齊書張緒傳及南史何晏傳並以爲七事誤也梁書伏
曼容傳及世說文學篇皆作九事與此同

殆非小心翼翼多福之仁

殿本考證云太平御覽仁作人

注

因請輅爲卦輅旣稱引鑒戒晏謝之曰知幾其神乎古人以

爲難交疏而吐誠今人以爲難君今一面盡二難之道可謂明德惟馨詩不云乎中心藏之何日忘之

世說規箴篇注引名士傳云是時曹爽輔政識者慮有危機曼有重名與魏姻戚內雖懷憂而無復退也著五言詩以見志鴻鵠比翼游羣飛戲太清常畏大網羅憂禍一旦并豈若集五湖從流唼浮萍永甯曠中懷何爲怵惕驚蓋因輅言懼而賦詩

毓大愕然曰君可畏也死以付天不以付君

殿本考證云太平御覽作君可畏人也命以付天

內方外員五色成文含寶守信出則有章

錢大昕曰文與章非韻疑成文二字當爲文成

注輅於此爲論八卦之道及爻象之精

明監本爲論八卦下又重八卦二字衍文也今 殿本已刊正

鳥丸 傳 烏丸鮮卑稍更彊盛亦因漢末之亂中國多故不遑外討

故得擅漠南之地 又 由是邊陲差安漠南少事

陳浩曰漠南疑當作漠南蓋就彼言之漠以南也兩漠南字並誤

注 悉禿頭以爲輕便

何焯曰禿一本作髡說文髡字注云大人曰髡小人曰髡

又 父兄死妻後母執嫂 又 俗識鳥獸孕乳時以四節

殿本考證云後漢書執嫂作報嫂以下有別字

又 能刺韋作文繡織縷氍毹 又 烏丸大人郝且等 又 漁陽烏丸

大人欽志賁

殿本考證云後漢書種暹作𦵏𦵏無樓字且作旦欽作歆
遼西烏丸大人耶力居衆五千餘落上谷烏丸大人難樓衆九
千餘落各稱王而遼東屬國烏丸大人蘇僕延衆千餘落自稱
峭王右北平烏丸大人烏延衆八百餘落自稱汗魯王又耶力
居死子樓班年小從子蹋頓有武畧代立總攝三王部衆又紹
矯制賜蹋頓難峭王汗魯王印綬皆以爲單于

李龍官曰據上文則難下當有樓字照注則難字宜衍按前
列耶力居難樓峭王漢魯王爲四大人耶力居死蹋頓代立
故當爲賜蹋頓難樓峭王汗魯王也 後漢書作賜蹋頓難
樓蘇僕延烏桓烏延等皆以單于印綬峭王卽蘇僕延也汗
魯王卽烏延也難樓爲上谷烏丸大人與遼西之蹋頓右北
平烏延並相雄長

後樓班大峭王率其部衆奉樓班爲單于

殿本考證云元本作後難樓及峭王率其部衆 按樓班大謂樓班年旣長也

後袁尙敗奔蹋頓馮其勢復圖冀州

馮其勢元本作借兵欲三字後漢書作尙欲憑其兵力復圖中國

以柔爲校尉猶持漢使節治廣甯如舊

潘眉曰上谷郡有甯縣又有廣甯縣漢置烏桓校尉於上谷甯城則甯縣而非廣甯縣也下鮮卑傳注亦云止烏丸校尉所治甯下後漢書亦作甯城下然則此廣字疑衍文尙與蹋頓將衆逆戰於凡城

水經濡水注云盧龍東越青徑至凡城二百里許自凡城東

北出趨平閑故城可百八十里向黃龍則五百里

太祖登高望虜陣柳軍未進觀其小動

殿本考證云柳疑作抑

鮮卑傳

鮮卑

注

別保鮮卑山因號焉其地東接遼水西當西城常

以季春大會作樂水上

殿本考證云元本西城作西域後二句後漢書作以季春月大會於饒樂水上章懷注云水在今營州北然則此注有脫誤也 晉書慕容廆載記云其先有熊氏之苗裔世居北夷邑於紫濛之野號曰東胡其後與匈奴竝盛控弦之士二十餘萬風俗官號與匈奴畧同秦漢之際爲匈奴所敗分保鮮卑山因以爲號會祖莫護跋魏初率其諸部入居遼西從宣帝伐公孫氏有功拜率義王始建國於棘城之北遂以慕容

爲氏祖木延左賢王父陟歸以全柳城之功遂拜鮮卑單于
遷邑於遼東北方

又未有名通於漢而由自與烏丸相接又築南北兩部質官受
邑落質者二十部

殿本考證云由字疑衍質官元本作質館按後漢書官本
作館二十部作百二十部

又圍烏丸校尉於馬城度遼將軍耿夔及幽州刺史救解之
趙一清曰後漢書烏丸校尉徐常也幽州刺史龐參也

又趙五原甯朔

趙一清曰甯朔乃蔓柏之譌兩漢志蔓柏屬五原郡

又殺代郡太守又投鹿侯從匈奴軍又施法禁曲直

趙一清曰代郡太守李超也又曰投鹿侯上有脫文後漢書

桓帝時鮮卑檀石槐父投鹿侯初從匈奴軍又曰曲直上後漢書有平字此脫也

又從右北平以東至遼遼接夫餘貊爲東郡又嘉平六年

後漢書遼遼作遼東貊作濊貊此譌脫嘉平作熹平是也

又遣護烏丸校尉夏育破鮮卑中郎將田晏匈奴中郎將臧旻與南單于出雁門塞三道並進

後漢書夏育出高柳田晏出雲中臧旻率南單于出雁門是爲三道

又乃案行烏侯秦水又聞汗人善捕魚又東擊汗國

後漢書烏侯作烏集汗人作倭人汗國作倭人國

又北地庶人善弩射者

後漢書庶人作廉人注廉縣名屬北地郡

軻比能本小種鮮卑

趙一清曰據晉書軻比能之後卽契丹也

長老說有異面之人

何焯曰異當作累下云項中復有面也

夫餘夫餘在長城之北

按夫餘他書多作扶餘

有豪民名下戶皆爲奴僕

殿本考證云名宋本毛本俱作民

以殷正月祭天

何焯曰用殷正月而尙白猶箕子之遺教也

自謂亡人抑有似也

何焯曰似當作以

三國志卷之九
注昔北方有橐離之國者

後漢書橐離作棠離章懷注棠或作橐此作橐蓋橐之譌

又王疑以爲天子也又南至施掩水

殿本考證云太平御覽引天子作天生後漢書施掩水作施
源水

高勾麗傳高勾麗在遼東之東千里又其官有相加對盧沛者古雛
加主簿優台丞使者皂衣先人尊卑各有等級

後漢書古雛加作古雛大加注云高麗掌賓客之官如鴻臚
也優台下無丞阜作帛太平寰宇記卷百七十三云高麗
建官有九等其一曰吐捩舊名大對廬總知國事次曰太
兄次鬱折華言主簿次大夫先使者次皂衣頭大兄東夷相
傳所謂皂衣先人者也以前五官掌機密謀政事徵發兵馬

選授官爵次大使者次大兄次收位使者次上位使者次小兄次諸兄次過節次不過節次先人又有狀古雛加掌賓客比鴻臚卿以大夫使者爲之又有國子博士太學博士舍人通事典書客皆小兄以上爲之又其諸大臣置僣薩比都督諸城置處間近支比刺史亦謂之道使其武官曰大模達比衛將軍以阜衣頭大兄以上爲之次末客比中郎將以大兄以上爲之其次領千人以上皆有差等

本有五族有涓奴部絕奴部順奴部灌奴部桂婁部

後漢書涓作消下同注云高麗五部一曰內部一名黃部卽桂婁部也二曰北部一名後部卽絕奴部也三曰東部一名左部卽順奴部也四曰南部一名前部卽灌奴部也五曰西部一名右部卽消奴部也

州郡縣歸咎於勾麗侯駒

錢大昕曰駒當作騶下同

遼東太守蔡風

後漢書蔡風作蔡諷下同

宮死子伯固立

又今句麗王宮是也

又今王生墮地

按漢書宮死子遂成立遂成死子伯固立此疑有脫誤 錢大昕曰承祚作志之時位宮久已破亡不應云今王蓋承舊史之文

東沃沮傳東沃沮在高勾麗蓋馬大山之東

沈欽韓曰遼志海州本沃沮國地高麗爲沙卑城 一統志

云今奉天海城縣治又云蓋馬卽唐之蓋牟今奉天府蓋平

縣也

責其租賦貂市

賦一本作稅與後漢書同貂市後漢書作貂市又一本作貂布

注魏畧曰其嫁娶之法女年十歲已相設許婿家迎之長養以爲婦至成人更還女家女家責錢錢畢乃復還婿

梁王繩曰此卽今之養媳本夷俗也

一名置溝婁

置母邱儉傳作買

其身如中國人衣

後漢書作其形如中人衣國字蓋衍

傳婁挹婁在夫餘東北千餘里

顧祖禹曰挹婁城在鐵嶺衛東六十五里

善射射人皆入因

因字誤後漢書作曰

濊濊南與辰韓北與高句麗沃沮接東窮大海今朝鮮之東皆其地也戶二萬昔箕子既適朝鮮作八條之教以教之無門戶之閉而民不爲盜其後四十餘世朝鮮侯淮僭號稱王

殿本考證云後漢書淮作準 按後注引魏畧亦作準

不請勾麗言語法俗大抵與勾麗同

殿本考證云請疑當作諳 按後漢書勾作勾麗字衍

白單單大山領以西

單單大領見前東沃沮傳後漢書作單大領

韓韓有三種一曰馬韓二曰辰韓三曰弁韓

趙一清曰弁韓後漢書作弁辰然弁辰別是一國則此當作

弁韓以當三韓竊疑范氏爲非

巨瀆活國

又支半國

又莫盧國

殿本考證云宋本活作沽支作友 朱良裘曰馬韓有兩莫
盧國疑有一重出或有訛字

注

至滿潘汗爲界

潘字譌兩漢志俱作番汗

又

朝鮮與燕界於溟水

又故中國亡命

沈欽韓曰溟當作浪方輿紀要大通江在平壤府城東亦曰
大同江舊名浪水 按後漢書郡國志樂浪郡浪水縣西至
增地入海今大同江也 何焯曰故字當作收

注

廉斯鑄爲辰韓右渠帥聞樂浪土地美人民饒樂亡欲來降
後漢書東夷傳云建武二十年韓人廉斯人蘇馬提等詣樂

浪貢獻光武封蘇馬謖爲廉斯邑君使屬樂浪郡注廉斯邑名

又辰鏹因將戶來來出詣含資縣

殿本考證云辰鏹辰字來出來字疑皆衍 顧祖禹曰含資城在王京南境隋大業中伐高麗分軍出合資道蓋以漢縣爲名耳

建安中公孫康分屯有縣以南荒地爲帶方郡

沈欽韓曰通典引此作分屯有有鹽縣方輿紀要引通典作分屯有昭明二縣 按晉志屯有屬遼西郡有鹽地無考疑此志脫二字而通典有鹽亦傳寫之誤

弁辰 傳 弁辰亦十二國

殿本考證云此弁辰疑作弁韓下別有弁辰也

次有借邑

錢大昭曰上文敘馬韓作邑借范史同 明監本亦作邑借
到其北岸狗邪韓國七千餘里

後漢書狗作拘

南至邪馬壹國女王之所都

壹後漢書作臺隋書倭國傳都於邪靡堆蓋卽魏志所謂邪
馬臺也

今以絳地交龍錦五匹注臣松之以爲地應爲綈

潘眉曰裴說是也考說文綈厚繪管子輕重訓魯梁之民善
爲綈注繪之厚者謂之綈急就章綈絡縑練素帛蟬注綈厚
繪之滑澤者也鄴中記錦或青綈或白綈或黃綈或綠綈或
蜀綈蓋綈卽錦之地字皆作綈不作地也

遣塞曹掾史張政等

陳景雲曰塞疑當作奏

注魏畧曰西戎傳曰

殿本考證云上曰字衍

又其自相號曰盍稚各有王侯多受中國封拜

晉書姚弋仲載記云其先禹封舜少子於西戎世爲羌酋其
後遷邠率種人內附漢朝嘉之假冠軍將軍西羌校尉歸順
王處之於南安之赤亭邠元孫柯迴爲魏鎮西將軍綬戎校
尉西羌都督又李特載記云其先廩君之苗裔漢末張魯居
漢中以鬼道教百姓實人敬信巫覡多往奉之值天下大亂
自巴西之宕渠遷於漢中楊車坂抄掠行旅百姓患之號爲
楊車巴魏武帝剋漢中特祖將五百餘家歸之拜爲將軍遷

於洛陽北土復號之爲巴氏

又近去建安中興國氏王阿貴白項氏王千萬

宋書氏胡傳畧云陽清水氏楊氏秦漢以來世居隴右爲豪族漢獻帝建安中有楊騰者爲部落大帥騰子駒勇健多計畧始徙仇池仇池地方百頃因以百頃爲號四面斗絕高平二十餘里羊道蟠道三十六回山上豐水泉煮土成鹽駒後有名千萬者魏拜爲百頃氏王千萬子孫名飛龍漸彊盛又今之廣平魏郡所守是也

按平字衍文下云近在廣魏卽此晉志畧陽郡本名廣魏

又高昌轉西與中道合龜茲爲新道又精絕國又皮亢國

殿本考證云毛本新道作西道精絕作絕精水經河水注皮山國治皮山城去莎車三百八十里亢字恐誤

又髮青如青絲乳青毛蛉赤如銅又復立者其人也

殿本考證云世說注作髮如青絲爪如銅復立作復豆

又一名漢越王在天竺東南數千里

殿本考證云王各本俱誤作正今從宋本作王

又烏弋一名排持

殿本考證云北宋本持作特

又度伐布溫宿布

殿本考證云毛本作度伐布溫色布

又王治於賴城

水經河水注云龍城故姜賴之虛胡之大國也蒲昌海溢邊
覆其國城基尙存而至大晨發西門莫達東門澮其崖岸餘
溜風波稍成龍形因名龍城地廣千里 案姜賴之虛疑卽

賴城也

又出好馬有貂

太平寰宇記卷一百八十五貂上有名字

又康居長老傳聞常有商度

太平寰宇記卷一百八十五云嘗有商旅行北方迷惑失道而到國中甚多真珠夜光明月珠見者不知名此國號以意商度此恐有脫文

三國志旁證卷十八終

三

三

三國志旁證卷十八終

三國志旁證卷十九

閩長樂梁章鉅撰

蜀志

潘眉曰先主卽尊繼漢統不以蜀爲國號江表傳載吳主曰前所以名西爲蜀者以漢帝尙存故耳今漢已廢自可名爲漢中王後爲帝遂稱爲漢故其盟文曰自今日漢吳旣盟之後戮力一心陳志改漢爲蜀於義未當也

二牧

何焯曰二牧不從董袁之例而列蜀志非夷昭烈於割據也王者之興先有驅除評云慶鍾二主卽以漢家故事明統緒所歸天祚眞主卽二牧猶不得以妄干耳其文則若霸主之思其義莫非天子之事遺臣故主之思淵矣哉 李清植曰

焉璋以枝葉之親而陰懷攘竊之志漢帝既嘗收戮其二子則亦與於叛亂之數者也蜀志之首二牧所以明先主之取益於義爲可又將以董扶所謂益州有天子氣者爲季興受命之符何焯之論確矣而未盡也

劉焉傳劉焉字君郎江夏竟陵人也

殿本考證云一本作君朗趙一清曰後漢書亦作君郎蓋宋避聖祖諱書朗爲郎遂訛作郎耳 太平御覽卷五百五十九引盛宏之荊州記云鄭卿鄉鄭滅地方也岡南有劉長沙墓益州牧焉之父

以宗室拜中郎後以師祝公喪去官

注

祝公司徒祝恬也

殿本考證云後漢書中郎作郎中

後漢書桓帝紀云延熹

二年八月光祿大夫中山祝恬爲司徒三年六月司徒祝恬

薨章懷注恬字伯休虜奴人

焉覩靈帝政治衰缺王室多故乃建議言刺史太守貨賂爲官割剥百姓以致離叛可選清名重臣以爲牧伯鎮安方夏焉內求交趾牧欲避世難議未卽行

劉昭續百官志注云孝靈在位橫流旣極劉焉徼僞自爲身謀非有憂國之心專懷狼據之策抗論昏世薦議愚主盛稱宜重牧伯謂足鎮壓萬里挾姦樹算苟罔一時豈可永爲國本長期勝術哉夫聖王御世莫不大庇生民承其休謀傳其典制猶云事久弊生無或通貫故變改正服革異文質分爵三五參差不一況在豎駭之君挾姦詐之臣其所創置哉焉可仍因大建尊州之規竟無一日之治故焉牧益土造帝服於岷峨袁紹取冀下制書於燕朔劉表荆南郊天祀地魏祖

據究遂構皇業漢之殄滅禍源乎此及臻後代任寄彌廣委之邦宰之命授之斧鉞之重假之都督之威開之征討之畧晉太康之初武帝亦疑其然乃詔曰上古及中代或置州牧或置刺史置監察御史皆總綱紀而不賦政治民之事任之諸侯郡守昔漢末四海分崩因以吳蜀自擅自是刺史內親民事外領兵馬此一時之宜爾今賴宗廟之靈士大夫之力江表平定天下合之爲一當韜戢干戈與天下休息諸州無事者罷其兵刺史分職皆如漢氏故事出頒詔條入奏事京城二千石專治民之重監司清峻於上此經久之體也其便省州牧晉武帝見其弊矣雖有其言不卒其事

而并州殺刺史張益梁州殺刺史耿鄙

後漢書益作懿梁作涼 錢大昕曰避晉帝諱改之 按書

中懿師昭炎字皆不諱不應獨改此名當是傳寫之誤 殿

本考證云張益宋本作張壹

當收儉治罪

注

劉焉爲益州劉表爲荊州

又

臣松之案靈帝崩

後義軍起孫堅殺荊州刺史王叡然後劉表爲荊州不與焉同時也

潘眉曰此詔目如此非實事也儉爲馬相所殺郤正傳亦云爲賊盜所殺 趙一清曰後漢書有太僕黃琬爲豫州牧無劉表案表傳云李傕郭汜入長安欲連表爲援乃以表爲鎮南將軍荊州牧裴注爲審也

及太倉令會巴西趙應棄官俱隨焉

注

子弟自遠而來

殿本考證云會字疑衍元本子弟作弟子來作至

又故號曰致止言人莫能當所至而談止也

潘眉曰敦當爲至

又宓曰董扶褒秋毫之善貶纖芥之惡

按此語亦見後漢書方術傳 何焯曰趙岐孟子注云孔子舉毫毛之善貶纖芥之惡故皆錄之於春秋二句必經師成語也

是時涼州逆賊

後漢書涼州作益州下云於綿竹會聚則作益州爲是合聚疾疫之民

殿本考證云疾疫宋本作疲疫

吏民翕集

明監本集作習誤今 殿本已改正

攻益州殺儉

華陽國志云馬相趙祇等殺刺史儉儉從事史燕邠宋元侯使在葭萌與從事董馥張允同行聞故哀痛說馥允赴難不可邠歎曰使君已死何用生爲獨死之焉嘉之爲圖象學宮破壞三郡

趙一清曰水經注益州舊以蜀郡廣漢犍爲三蜀所謂旬月之間破壞三郡者也

州從事賈龍素領兵數百人

華陽國志領兵作領家兵

龍乃選吏卒迎焉焉徙治綿竹

何焯曰東漢益州刺史治雒縣焉以卻儉被殺故徙治綿竹綿竹西漢都尉所治也

張魯母始以鬼道又有少容

後漢書少容作姿色 何焯曰所謂少容蓋能久視之意范
欲醜之甚其詞耳

焉遣魯爲督義司馬

侯康曰洪适嘗言劉焉在蜀創置督義司馬助義褒金校尉
劉表在荆亦置綏民校尉漢政旣衰諸侯擅命率意各置官
屬如此 接近人吳卓信撰補三國職官志不列此名亦以
二牧所置外之耳

斷絕谷閣

潘眉曰谷閣謂斜谷及閣道三秦志云自秦入蜀有三谷四
道三谷者其西南曰褒谷南曰駱谷從洋入東南曰斜谷從
郿入其所從皆殊舊志謂首尾一谷非是其棧道有四出從
成和階文出者爲沓中陰平道鄧艾伐蜀由之從兩當出者

爲故道漢高帝攻陳倉由之從褒鳳出者爲連雲棧道漢王之南鄭由之從城固洋縣出者爲斜路道武侯屯渭上由之此四道三谷者關南之險阨攻取所從來固矣

注鑠械於郿塢爲陰獄繫之

繫一本作擊誤今 殿本已改正

注璋將沈彌婁發甘甯反擊璋

潘眉曰此甘甯卽甘興霸本傳不載曾仕於璋然吳書稱甯曾客巴郡補蜀郡丞後乃依劉表卽在是時

又屯胸臆上蠡下如振反

潘眉曰胸音劬此古音也章懷吳漢傳注引十三州志音春晉書音義引如淳曰音蠡後又改胸爲胸胸旣俗字蠡亦非舊音不可從臆字亦宜從地理郡國二志作忍 按關駟曰

胸肭蚯蚓也土地下溼多胸肭蟲也章懷注雲安西萬戶故城卽漢之胸肭縣

劉璋傳璋累遣龐義等攻魯所破

按此處均有脫誤所破上當從通鑑有數爲魯三字

魯部曲多在巴西故以義爲巴西太守領兵禦魯

後漢書作多在巴士故以義爲巴郡太守 續郡國志巴郡

注引譙周巴記云初平六年趙韙分巴爲二郡欲得巴舊名故卽以墊江爲治安漢以下爲永甯郡建安六年劉璋分巴以永甯爲巴東郡以墊江爲巴西郡趙一清曰此引巴記有脫誤是以三巴之說不甚分明全氏祖望云初平六年趙韙分巴爲二建安六年以蹇允之訟分巴爲三以永甯爲巴東閬中爲巴西墊江爲巴郡是乃三巴分置之次第也但初平

僅四年云六年字誤耳又劉璋嗣位以趙韙爲征東乃興平元年正分巴之歲也誤以爲初平迨建安六年趙韙誅故再分巴耳

璋聞曹公征荊州已定漢中

按此處恐亦有脫誤操定漢中張魯遁走是建安二十年尙在此後數年也

兄瑁平寇將軍

按焉傳言焉子範爲左中郎將誕治書御史璋爲奉車都尉皆從獻帝在長安惟小子別部司馬瑁素隨焉則瑁乃璋弟稱兄瑁誤

先主至江州北由墊江水詣涪去成都三千六十里

盧明楷曰鄧艾傳云徑漢德陽亭趣涪出劍閣西百里去成

都三百餘里此云涪至成都三千餘里似不應如此之遠三千或三百之訛也

先主至葭萌

顧祖禹曰葭萌城在保甯府廣元縣西北古苴國也華陽國志昔蜀王封其弟葭萌於漢中號曰苴侯命之邑曰葭萌

穀帛支二年又故佩振威將軍印綬

何焯曰宋本二作一故字在佩下

聽相者之言則求婚吳氏

潘眉曰此事本傳不載見穆后傳

注若韓嵩劉光之說劉表

劉表傳劉光作劉先 潘眉曰先字始宗當名先此光字誤

劉先傳中山靖王勝之後也勝子貞元狩六年封涿縣陸城亭侯

坐耐金失侯因家焉

陳浩曰漢書王子侯表陸城侯貞元朔二年六月甲子封十五年元鼎五年坐耐金免此云元狩六年恐誤 潘眉曰前漢無鄉亭之封考漢書王子侯表貞封陸城侯無亭字地理志陸成中山國縣名貞爲中山靖王之後故封中山國之陸成縣侯成字無土旁也又曰失侯在元鼎五年始當家陸後徙涿耳

舍東南角籬上有桑樹生高五丈餘

水經巨馬水注云督亢溝水東逕涿縣酈亭樓桑里南卽劉備之舊里也

叔父子敬謂曰汝勿妄語

錢大昭曰扶風孟達字子敬避先主叔父敬改爲子度見劉

封傳

除安喜尉

後漢書郡國志中山國安險應劭曰章帝更名安熹

注備嘗在京師復與曹公俱還沛國

殿本考證云復宋本作後

使爲青州刺史田楷以拒冀州牧袁紹

錢大昕曰爲字當是助字之譌

郡民劉平素輕先主恥爲之下使客刺之

趙一清曰前注引典畧言平原劉子平薦先主此言劉平刺之何相反也豈先主失歡於故人邪抑別一人也

彼州殷富戶口百萬

華陽國志彼州作鄆州 錢大昕曰作鄆州是也登下邳人

下邳屬徐州故云鄆州也彼字誤

注北至下邳兵潰又與袁術戰又敗

殿本考證云通鑑作比至 趙一清曰呂布傳注引英雄記
與此傳注異一書自相違伐殆不可曉通鑑從彼注
楊奉韓暹寇徐揚間先主邀擊盡斬之

通鑑考異云暹奉後與呂布同破袁術於時未死也

注饑餓困敗又諸將謂布曰

何校敗宋本作蹴謂宋本作請

先主敗走歸曹公曹公厚遇之

厚一本作後誤今 殿本已改正

注一震之威乃何至於此也

按華陽國志此後有公亦悔失言句似宜並引

承等皆伏誅

又

先主據下邳

又

先主乃殺徐州刺史車胄

何焯曰魏志建安四年備殺車胄五年承等謀洩乃死袁紀備據下邳亦在承死前蜀志誤也

注

其夜開後棚與飛等輕騎俱去

殿本考證云棚宋本作柵

青州刺史袁譚先主故茂才也

錢大昕曰汝南在豫州部先主領豫州故得舉譚茂才

與賊龔都等合衆數千人曹公遣蔡陽擊之

魏武帝紀龔都作其都龔其字同

殿本考證云蔡陽宋本

作蔡楊

注

騎的盧走渡襄陽城西檀溪水中溺不得出備急曰的盧今

日厄矣可努力的盧乃一踊三丈遂得過

傅元乘輿馬賦云劉備之初降也太祖賜之驄馬使自至廐
選之名馬以百數莫可意者次至下廐有的盧馬委棄莫視
瘦悴骨立劉備撫而取之衆莫不笑之其後奔荊州逸足電
發追不可逮衆乃服焉 趙一清曰世說注引伯樂相馬經
白額入口至齒者名曰榆雁一名的盧奴乘客死主乘棄市
囚馬也 水經沔水注云檀溪水西去城里餘北流注於沔
十二年曹公南征表會表卒

盧明楷曰武帝紀建安十三年秋七月公南征劉表八月表
卒此繫於十二年誤恐上更有脫文也

注與蒼梧太守吳臣有舊

殿本考證云吳臣疑作吳巨下同

治公安

注

江表傳曰備立營於油口改名公安

殿本考證云一本誤作公安縣今改正 陳浩曰油口宜作油江口然此注已見於曹公引歸之下此處不應重出

權稍畏之進妹固好

按先主納孫夫人事此其始見也 王曇曰此不紀年月大致在建安十三年十二月赤壁破魏蜀主牧荊州之時以十四年春婚於京也

十六年益州牧劉璋遣法正將四千人迎先主 注吳書曰備前見張松後得法正

通鑑考異云劉璋劉備傳松未嘗先見備吳書誤也

先主亦推璋持鎮西大將軍領益州牧

殿本考證云持通鑑作行宋本同 潘眉曰持下當有節字

璋敕關戍諸將文書勿復關通先主先主大怒召璋白水軍督

楊懷責以無禮斬之

太平御覽三百四十六引零陵先賢傳云劉璋請劉備備將
楊懷數諫備悟主人請璋子禕及懷酒酣備見懷佩匕首備
出匕首謂懷曰將軍匕首好孤亦有可得借觀之懷與之備
得匕首謂懷曰汝小子何敢問我兄弟之好邪懷罵言未訖
備斬之

先主徑至關中

趙一清曰關中謂白水關也在四川昭化縣二百五十里與
陝西甯羌州接

注及見卓引辭正色

殿本考證云引太平御覽作列

與郃等戰於瓦口

瓦口水經沔水注作汎口汎水名在上庸郡界

二十三年先主分遣將軍吳蘭雷銅等入成都

殿本考證云成都二字恐有誤 錢大昭曰武帝紀有任夔而無雷銅此傳有雷銅而無任夔

二十四年春自陽平南渡沔水緣山稍前於定軍山勢作營

潘眉曰山勢當是興勢之訛興勢亦山名在成固縣通典謂內有大谷爲盤道者是也法正傳不誤

大破淵軍斬淵郃及曹公所署益州刺史趙禹等

李龍官曰張郃死於建興九年此云淵郃恐誤通鑑無郃字

何焯曰華陽國志云斬夏侯淵張郃率吏民內徙則此郃及曹公所署益州刺史趙禹等之下當有脫字郃字非衍也通鑑刪郃字而以斬淵屬下及字讀亦誤 潘眉曰郃字當

爲等字法正傳大破淵軍淵等授首

遣劉封孟達李平等攻申耽於上庸

潘眉曰李平傳不載取上庸事考平以建安十九年爲犍爲太守至章武二年乃徵詣永安宮當劉孟攻上庸時平方在犍爲又平初名嚴至建興八年始改名平建安中不應書李平蜀又不聞有兩李平疑此二字爲衍也

秋羣下上先主爲漢中王表於漢帝

何焯曰據後注此表乃廣漢李朝所造此文在西京亦不多得疑諸葛公潤色也

左將軍領長史鎮軍將軍臣許靖

錢大昕曰領字衍彼傳不書鎮軍將軍史之漏也按靖爲左將軍長史在建安十九年此領字疑當在鎮軍之上

遂於沔陽設壇場

水經沔水注云沔陽縣故城蕭何所築也建安二十四年劉備定漢中立壇卽漢中王位於此城其城南臨漢水北帶通達南對定軍山

二十五年魏文帝稱尊號改年曰黃初或傳聞漢帝見害先主乃發喪制服追諡曰孝愍皇帝

李清植曰綱目旣以蜀漢爲正統則當以此諡爲正今綱目中不書愍而書獻蓋猶沿通鑑之誤按本書甘皇后傳及晉書劉元海載記並稱孝愍此外無聞

陽泉侯劉豹青衣侯向舉

宋書州郡志云廣漢太守領縣有陽泉蜀分綿竹立後漢書郡志云蜀郡屬國漢嘉故青衣陽嘉二年改

從事祭酒何宗

潘眉曰常璩言宗通推步圖讖讚立先主楊藝亦言宗援引圖讖勸先主卽尊號然則勸進表卽何宗所撰歟

勸學從事張爽尹默譙周等

何焯曰顧亭林言譙周傳建興中丞相領益州牧命周爲勸學從事與此前後不同案周卒於晉泰始六年年七十二當昭烈卽位之初年僅二十三未必與勸進之列從本傳爲是趙一清曰周羣傳羣子巨此表不知何人所作而云臣父羣豈周氏之子列名於中傳寫者誤爲譙周耶

謹案洛書甄曜度曰

潘眉曰赤家有三日高祖光武先主也昔王莽嫌三日見於讖緯改疊字爲疊至是卒符三日之讖

臣父羣未亡時言西南數有黃氣直立數丈

錢大昕曰此奏列名者有劉豹向舉張裔黃權殷純趙詳楊洪何宗杜瓊張爽尹默譙周等而忽稱臣父果何人之父邪華陽國志云周羣父未亡時似當從之又按周羣傳云子巨亦傳其術或臣爲巨之誤而上脫周字邪 潘眉曰華陽國志作周羣父未亡時則周舒也然周舒亦著名於時何以不竟稱周舒宋書符瑞志云先是術士周羣言云云爲羣無疑非舒也臣父羣父字當改周

光祿勳黃權

錢大昕曰上文已有偏將軍黃權不應重見考楊戲輔臣贊注先主爲漢中王用零陵賴恭爲太常南陽王柱爲光祿勳漢嘉王謀爲少府此傳三人連名必是王柱非黃權也黃權

傳亦無除光祿勳事 按王桂當作黃柱此錢依毛本輔臣
贊注之誤也

今上無天子海內惶惶靡所式仰羣下前後上書者八百餘人
潘眉曰前載一百二十人後十二人及此六人而已考太平
御覽十五引蜀志云劉毅白攀等上言建安二十二年必有
天子出其方今蜀志無此文然則譌脫不少矣

間黃龍見武陽赤水九日乃去

太平寰宇記卷七十四云黃龍廟在眉州彭山縣東二十八
里長江村導江東岸 華陽國志云建安二十四年黃龍見
武陽赤水仍立廟今有石碑存

又懼漢邦將湮於地

殿本考證云邦疑作祚

注魏書曰又典畧曰

潘眉曰魏書言斬冉絕使命典畧言有詔報答以引致之
說不同典畧爲確考王朗與許靖書云得因無嫌道初開通
展敘舊情以達聲問又曰正值天命受於聖主之會正在此
時

章武元年立宗廟祫祭高皇帝以下

注

臣松之以爲先主雖云

出自孝景而世數悠遠昭穆難明旣紹漢祚不知以何帝爲元
祖以立親廟於時英賢作輔儒生在官宗廟制度必有憲章而
載紀闕畧良可恨哉

李清植曰光武中興繼體元帝故成哀平三帝以及南頓君
以上四親皆別立廟先主行輩尊於孝愍又當別有四親之
廟故裴注云然但是時舊邦未復諸事草創所謂祫祭高皇

帝以下者殆循東京同堂異室之制而行之耳至於稽古禮文之事疑未遑暇故隋王通曰諸葛亮而無死禮樂其有興乎蓋指此類未必記載之有闕畧也

初先主忿孫權之襲關某將東征秋七月遂帥師伐吳

于慎行曰諸葛子瑜牋曰陛下以關某之親何如先帝荊州大小孰與海內俱應仇疾孰當先後此數言者卽腹心之臣借箸熟數亦何以踰而先主不悟甘心失策豈非天哉黃恩彤曰外結孫權隆中之對早策及此矣乃荊州之失伐吳之舉頓與初策相左當亦武侯所扼腕太息者也故猊亭旣敗卽許吳以和建興元年復遣鄧芝固好不得不用初策矣軍次秭歸武陵五溪蠻夷遣使請兵

後漢書郡國志南郡秭歸 水經江水注云秭歸縣城東北

依山卽坂周回二里高一丈五尺南臨大江古老相傳謂之
劉備城蓋備征吳所築也又沅水注云武陵有五溪謂堆溪
櫛溪無溪酉溪辰溪夾溪悉是蠻左所居故謂其蠻爲五溪
蠻也 太平寰宇記卷百二十云先主於五溪立黔安郡
三年夏四月癸巳先主殂於永安宮

潘眉曰先主以四月二十四日殂四月朔戊午二十四日辛
巳非癸巳也 水經江水注云章武二年劉備爲吳所破改
白帝爲永安巴東郡治也 黃恩彤曰吳志於權書薨魏志
於丕書崩史爲晉諱強以天王書崩之例子之耳於蜀獨書
先主殂於永安宮蓋書崩則礙於帝魏之嫌是二帝也書薨
則沒其帝蜀之義是無帝也故祖尙書帝乃殂落之文以尊
異之

注
射君到

錢大昭曰射君卽扶風射文雄也 何焯曰射君卽射援見

上表中列名

又勿以惡小而爲之勿以善小而不爲 又可讀漢書禮記閑暇

歷觀諸子及六韜商君書益人意智

按易繫辭云善不積不足以成名惡不積不足以滅身小人
以小善爲無益而不爲也以小惡爲無傷而不去也賈誼新
書審微篇亦云善不可謂小而無益不善不可謂小而無傷
昭烈臨終以此誠後主則所謂不甚讀書者恐未足概昭烈
之生平矣

注
聞丞相爲寫申韓管子六韜一通已畢

唐庚曰學者責孔明不以經書輔導少主乃用六韜管子申

韓之書吾謂不然人君不問撥亂守文要以智畧爲先後主寬厚仁義襟量有餘而權畧智謀是其所短當時識者咸以爲憂六韜述兵權畧計管子貴輕重權衡申子覈名實韓子引繩墨切事情施之後主正中其病矣

葬惠陵

太平寰宇記卷七十二云益州成都縣有東陵卽蜀先主陵也今有祠存號曰東陵神又云惠陵東西七十步齊高帝夢益州有天子鹵簿詔刺史傅單修立而卑小故相國李回在鎮更改置守陵戶四時祭祀

評曰機權幹畧不逮魏武是以基宇亦狹

藝文類聚卷二十二太平御覽卷四百四十七並引張輔名

士優劣論云世人見魏武皇帝處

據當作

有中土莫不謂勝劉

元德也余以元德爲勝夫撥亂之主當先以能收相獲將爲
本一身善戰不足恃也世人以元德爲呂布所襲爲武帝所
走舉軍東下爲陸遜所覆雖曰爲呂布所襲未若武帝爲徐
榮所敗失馬被創之危也元德還據徐州形勢未合在荊州
劉景升父子不能用其計舉州降魏手下步騎不滿數千爲
武帝大衆所走未若武帝爲呂布北騎所擒突火之急也元
德爲陸遜所覆未若武帝爲張繡所困挺身逃遁以喪二子
也若令高祖死於彭城世人方之不及項羽遠矣武帝獲於
宛下將復謂不及張繡矣而其安忍無親荀文若楊德祖之
徒多見賊害孔文舉桓文林等以宿恨見殺董公仁賈文和
恒以佯愚自免良將不能任行兵三十餘年無不親征功臣
謀士曾無列土之封仁愛不加親戚惠澤不流百姓豈若元

三國志卷十九終
德威而有恩勇而有義寬宏而大畧乎諸葛孔明達治知變
殆王佐之才元德無強盛之勢而令委質張飛關某皆人傑
也服而使之夫明闇不相爲用臧否不相爲使武帝雖處安
強不爲之用也況在危急之間勢弱之地乎若令元德據有
中州將與周室比隆豈徒三傑而已哉